

- कृति : शंबूक (अंगिका खण्ड काव्य)
- कृतिकार : हीरा प्रसाद 'हरेन्द्र'
ग्राम+पो०-कटहरा
सुलतानगंज (भागलपुर) ८१३२१३
- सम्प्रति : शिक्षक, रा० मध्य विद्यालय
कुमारपुर, कटहरा (सुलतानगंज)
- महामंत्री : अखिला भारतीय अंगिका साहित्य कला मंच
- सम्पादक : अंगप्रिया / मंजिल
- प्रकाशन तिथि : दशहरा 2009
- सर्वाधिकार : © प्रवीण कुमार 'प्रणव'
कटहरा (भागलपुर)
- शब्द संयोजन, मुद्रण व आवरण : मोदी ऑफसेट प्रिंटेर्स
आत्माबाजार, पहली मंजिल,
सुलतानगंज (भागलपुर)
- प्रकाशक : चन्द्रकान्ता प्रकाशन, कटहरा
- सहयोग राशि : 50/-

SAMBUK (KHAND KAWYA)

By Hira Prasad 'Harendra'

अवलम्बन आरू आभार

राम चरित मानस संसार के अलौकिक ग्रंथ छेकै, जेकरा सँ भारतवासी के पहचान देश-विदेश में होय छै। मानस के हजार पात्रों में ही सही एक पात्र 'शंबूक' छेकै। महर्षि शंबूक के कथा ढेर पढ़े-सुने के अवसर प्राप्त होलै। सरिता मुक्ता रिप्रिंट सेट (जे सरिता पत्रिका के कटिंग छेकै) में बिस्तार सँ पढ़लियै। पटना सँ प्रकाशित मासिक पत्रिका शंबूक भी देखलियै।

आजको वातावरण में मानव विकास के लक्ष्य के ओर उत्तरोत्तर अग्रसर तँ छै, वहीं मानवीय मूल्य आरू नैतिकता हास्यपूर्ण छै। ई परम्परा प्राचीन कालों सँ आय तौय पीछा नै छोड़ने छै। 'मानस' के उपेक्षित पात्र महर्षि शंबूक के प्रकाश में लाने के हमरो ई प्रयास के दर्पण में विवेकी आपनों बिम्ब के देखे पारतै। आधुनिकता के दौड़ में उपेक्षितों के प्रति चिन्तनशील होना कोय सामान्य बात नै छेकै। ई सोच के धरातल पर वहाँ व्यक्ति आबे पारें, जौने कहियो उपेक्षित के देखने-परखने छै। ओकरो सुख-दुख में सहभागी रहलें छै आरू अंतःकरण संवेदनात्मक अनुभूति सँ लबालब भरलें छै।

मर्यादा पुरुषोत्तम राम निषाद राज गुह के गला लगलकै आरू शबरी भिलनी के जुटों बेर खेलकै, ई मर्यादा के उज्ज्वल पक्ष छेकै मगर वोही रामे विद्याभ्यास आरू जोग-जप-तप में रत एक महर्षि के ई कहते होलें कि तौय शूद्र होय के ब्राह्मण होय के धृष्टता करने छै, तोरो अपराध अक्षम्य छै, तौ वध के काविल छे, गला घोट्टी देलकै, ई एक दोसरो पक्ष छेकै। ब्राह्मणवादी व्यवस्था में मर्यादा ओझराय के चरमराय जाय तँ ऊ मर्यादा के अवमूल्यन नै होय के की बात छै ! अग्नि परीक्षा में खरी उतरली सीता के सामान्य जन के बातों पर, बिना समुचित बिचार करलें वनवास भेजी देना की मर्यादा के कलकित नै करै छै?

रामचन्द्र के राजों में शूद्र द्वारा जोग-जप-तप करे के पापों सँ एक ब्राह्मण के बेटा मरी जाय छै। ई बात कोय मनगढ़न्त नै, पुष्टि में राम चरित मानस के पक्ति देखियै-

रघु दिलीप शिवि सगर नरेसा। अमित प्रभाव भए अवधेसा॥

पितु जीवत सुत त्यागहु प्राणा। प्रभु अन्तर्यामी सुनि काना॥

(रघु, दिलीप, शिवि, सगर सब बड़ा प्रतापी अयोध्या के राजा होलें मतर ऐसनों कभी नै होलें कि पिता के रहते-पुत्र प्राण त्यागी देलकै।)

प्रभु चित देखि गगन भइ वानी। शूद्र तपै सुनु सारंग पानी॥

बिंध्याचल गंभीर बन माहा। द्विज सुत हेतु मरन मरनाहा॥

(बिंध्याचल पर्वत के गंभीर वन में शूद्र तप करै छै, यही लेली ई ब्राह्मण के बेटा मरलै।)

यहाँ सम्पूर्ण मानस में शूद्र के नाम नै बोललें गेलें छै। क्षत्री होय के निदोष बालि के राम द्वारा छिपी के मारै के बात जब महर्षि शंबूक उठैलकै तें वशिष्ठ जी के उक्ति—

अनुज बधू भगिनी सुतनारी। सुनु सठ कन्या सम ए चारी॥

इन्हहि कुदृष्टि बिलोकई जोई। ताहि बधे कछु पाप न होई॥

प्रत्युत्तर में महर्षि कहै छै—बड़ों भाय के पत्नी तें माता के समान मगर बालि के मरला पर तारा के साथ, रावण के मरला पर मन्दोदरी के साथ क्रमशः सुग्रीव आरू विभीषण नें पत्नीवत् व्यवहार करलकै, तखनी धनुष—बाण आरू तरकश कहाँ छेलै? महर्षि शंबूक के बातों के पुष्टि ई पक्ति से होय जाय छै जे मानस में 'लव' के द्वारा विभीषण के कहलें गेलें छै—

पिता समान बंधु बड़ तोरा। त्रिया तासु लै घर बरजोरा॥

पापी मातु कहै के वारा। सो पत्नी तेई धर्म तुम्हारा॥

समर भूमि मम सनमुख आवा। लाज होत नहीं गाल बजावा॥

(पिता के समान बड़ों भाय के पत्नी के तोंय बरजोरी अपना घरों में राखलहैं। रे पापी ! तों केतना बार माता कही के पुकारनैं होभैं ओकरा तोंय स्त्री बनाय लेलहैं। रणभूमि में हमरा आगू आबी के गाल बजाय में तोरा लाज नै लागै छौ।)

सुग्रीव—तारा के संबंध तिलक रामायण में देखियै—

तारा भी सुग्रीव की, बनी प्रिया दिल खोल।

वाली के प्रासाद में होने लगा किलोल॥

भूल गये सुग्रीव सब, अपने सारे कष्ट।


रूमा—तारा संगमें, हुए रात—दिन व्यस्त॥

उपर्युक्त तथ्यों के आधार पर शंबूक खण्ड काव्य के रचना करलियै। कथा शृंखला के मिलान में थोड़ों कल्पना के पुट जरूरी जानी अपना के नै रोके पारलियै। ई काव्य विराट के गोड़ों पर वामन के देलें क्षुद्र उपहार जानी हृदय से लगैइयै।

अन्त में सुलतानगंज के साहित्यकार प्रोग्रामर जी, सत्यम जी, मोदी जी, आरू पाठक जी के साथे डा. अमरेन्द्र के प्रति आभार नै व्यक्त करना अन्याय होतै। डा. अमरेन्द्र अहिनी साहित्यकार छेकै जे अन्य साहित्यकार के हृदय के उद्वेलित करै में उत्प्रेरक के काम करै छै। उनको उत्प्रेरणा के परिणाम शंबूक अंगिका खण्ड काव्य के कहना अतिशयोक्ति नै होतै।

—हरेन्द्र

॥ समर्पण ॥



स्व० सत्यु प्रसाद सिंह, भूतपूर्व मुखिया



ग्राम+पंचायत-कटहरा के

जिनको व्यक्तित्व

पूरे पंचायत में छैलें छै।



3/26

विष्णुचक्र कवि के अन्तर्गत में गुरु का करे है, यही लेखी ई आराम
के प्रदा मरले।

यही अन्तर्गत में गुरु ई कृति लेखे है। अही रूप में कवि
कवि ने कवि का नाम लिखा है।



अन्तर्गत में गुरु का करे है, यही लेखी ई आराम
के प्रदा मरले।

यही अन्तर्गत में गुरु ई कृति लेखे है। अही रूप में कवि
कवि ने कवि का नाम लिखा है।

‘शंबूक’ यानी लोकतंत्र रों शव यात्रा

सच्चा कवि भूत, वर्तमान आरों भविष्य के मिट्टी, पानी, आग से कविता के मूर्ति गढ़े है। हेनों मूर्ति नै छूले-छाले तें टूटे-भागे है आरों नै पानी में राखी देला से गलवे करै है। हीरा प्रसाद ‘हरेन्द्र’ के खंड काव्य ‘शंबूक’ हेने काव्य-मूर्ति छेके।

‘हरेन्द्र’ के शंबूक के खाली रामायण काल के शंबूके रूपों में देखना ई कृति के साथ अन्याय होतै, कुछ होने अपराध, जे रामायण काल के शंबूक साथे होलै। अगिका के ई कृति के द्वार बीसवीं सदी के दिशा से खुले है आरों हुन्हे से प्रवेश करला पर एकरों भीतर के संसार के पहचानलों जाबे सके छे, पर पछियो झड़ोखा से हुलकला पर जे कुछ झलकै है, ऊ झूटो नै छेके। हों, झड़ोखा से मूर्ति के पीठ दिखावे पारे, मूँ-आँख नै। ‘हरेन्द्र’ के काव्य ‘शंबूक’ के मूँ-आँख तें ओकरा में अभिव्यक्त वर्तमान रों रूप छेके।

मजकि है एक बात बताना जरूरी है कि कवि आधुनिकता के व्यक्त करै लें कहुँ परंपरा के लोक विश्वास के मूर्ति के क्षति नै पहुँचैलें है, बस, थोड़ों टा ओकरों कोण बदली देलें है कि वै में वर्तमान जगमगाय उठे।

हरेन्द्र के ‘शंबूक’ में राम के भव्यता-रम्यता वहे छेके जे लोक मानस के राम के छेके। बस होय है इतना कि शंबूक पर न्याय लेली जे सभासद के राम बोलावे है, आरों जे सभासद के विधि ज्ञानी हाथों में जौन किसिम के विधि-सहिता लेने खाड़ों होय है, हौ सब कुछ हेने तिरछों रेखा से उभारलों गेलों है कि ओकरा में स्वातंत्र्योत्तर भारत के सत्ता, आरों सत्ता के आसपास जमा होलों अफसरशाही साथे-साथ खाड़ों होय जाय है। न्याय पीठ के न्याय के तस्वीर उभरी आवै है। हरेन्द्र कृत ‘शंबूक’ के रचना-प्रक्रिया यहीं से शुरू होय है।

ई प्रक्रिया जों-जों आगू बढ़ै है, काव्य के पात्र-संवाद में एक खास किसिम के परिवर्तनो ऐलों चललों जाय है। लागै तें यहा है कि एक रामायण कथा आगू बढ़ी रहलों है, लेकिन ओकरे समानान्तर एकटा आरों कथा सृजित होलें मूल कथा साथे आगू बढ़ै है। ई नया कथा राम के रूप में सत्ता पर विराजमान आयकों शासक वशिष्ठ ब्राह्मण के रूप में आयकों न्यायविद, पोथी-पतरा रूप में

भारतीय सविधान आरो शंबूक रूपों में स्वतंत्र भारत के पद दलित प्रजा, अभागलों दलित-समाज आमना —सामना होय जाय छै।

न्याय, नीति आरों समरसता के स्थापना में कहीं न कहीं आत्महित में लीन ज्ञानी रों अहंकार लोकतंत्र में लोक के विरोधी बनी ऐलों छै, ई बात कें समझावै में ई खंड काव्य जरूरे सहायक बनै छै। आरो यहू कि कोन किसिम से हेनों लोग सत्ता कें भयभीत करी, एक अनाचार के घटित होय के परिस्थिति पैदा करी दै छै। शंबूक आपनों निर्मल स्वभाव से राम कें जोड़े लें चाहै छै, मतरकि राम के दिमाग में सिर्फ पण्डिते के बात तखनियो तांय घूमते रही जाय छै। तें कारण स्पष्ट छै।

‘शंबूक’ काव्य में नैं खाली राम के रूप के रक्षा होलों छै, बलुक शंबूको के। शंबूक के चरित्र—उद्घाटन वास्ते यहाँ कवि दू रास्ता अखितयार करलें छै—एक तें प्रकृति के सहारा से, दूसरो ओकरों संवाद से।

शंबूक जे आश्रम में रहै छै, ओकरों आसपास के रम्य प्रकृति के संगीत आरो निखार शंबूक के ऋषि-व्यक्तित्व बतावै में आपन्हें सक्षम छै। कवि कें कहै के जरूरते नैं छै। आलोच्य काव्य में चरित्र—उद्घाटन के ई शैली सहृदय कें बाँधी कें राखी लै छै।

फेनू जैठां शंबूक के संवाद छै, वहू से ई काव्य पात्र के, खास करी कें निर्भय वाला व्यक्तित्व प्रगट होय छै, ओकरों तार्किकता तें मोहैवे करै छै। जगदीश गुप्त के खंड काव्य ‘शंबूक’ में भी शंबूक के ई भय मुक्त स्वभाव के सुन्दर चित्र प्राप्त छै। यहाँ ई जानी लेना चाही कि शंबूक में ई निडरता कवि नें अतीत के छायाहै में गढ़लें छै। शंबूक, रावण के बहिन सूर्पणखा (वज्रमणि) के बेटा छेलै। वज्रमणि आपन्हें निडर, निर्भय स्वभावों के युवती रहें, यै लें हरेन्द्र के काव्य में शंबूक के जे निर्भयता, स्पष्टवादिता के रों रूप छै, ऊ अनटैटलों नैं लागै छै। जगदीश गुप्त के खंड काव्यो में यहाँ निर्भयता आरो स्पष्टवक्ता के रूप वयक्त होलों छै।

अंगिका के काव्य कृति के शंबूक जबे क्षत्रिय—शूद्र के बात उठावै छै आरो तारा—सुग्रीव के साथे मन्दोदरी—विभीषणों के, तें यहाँ एक विशेष रूपक—विधान खाड़ों होय छै। ई रूपक में भारत के लोकतंत्र में भ्रष्ट सत्तासीन आरो ओकरों आगू—पीछू करै वास्ते विधि—विधान झलकी उठै छै, जे सब ताखाहै पर पुर्जा

नाँखी ओकरों पक्ष में रखलें रहै छै। ई विधि—विधान तभिये फड़फड़ावै छै, जखनी प्रजा कें दंडित करना होय छै। अजीब ई लोकतंत्र के व्यवस्था छै—अपराध करै छै बड़ों—बड़ौक्का लोग, भोगै छै गरीब—गुरबां। ब्राह्मण कुमार कें काटै छै साँपें आरो मूडी कटावै छै शंबूक। कवि हरेन्द्र नें राम राज्य के आड़ में लोकतंत्र के ई सच्चाई दिखावै लें ही ई काव्य के काया गढ़ने छै।

अंगिका भाषा में लिखलें गेलों ई शंबूक खण्ड काव्य, नैं खाली आधुनिक भारत में पद दलित प्रजा, दलित समाज के क्षत्रीय रूप कें ही उद्घाटित करै छै, बल्कि ई बहाना पूरे अंगिका साहित्य के प्रवृत्तियों कें उद्घाटित करै छै। बिला शक के, आलोच्य ‘शंबूक स्वतंत्र भारत में दलित समाज के पीड़ा आरो उपेक्षा से उठलों उग्र चेतना कें बेखटके राखै में समर्थ छै।’

हेना कें तें ब्रजमणि के पुत्र होला के कारणों शंबूक के संबंध अंग प्रदेश से नैं ठहरै छै, मतरकि प्रबन्धकार नें शंबूक के चरित्र में कुछ हेनों गुण—शील के रंगों भरलें छै, जे अंग देश के उदात्त, विस्मृत ब्रात्य धर्म से जुड़लो होलों छै। होन्हौ कें रामायण के अधिकांश प्रमुख पात्र, राम से लै कें रावण तांय, के जुड़ाव अंग देश से रहलै छै, कैन्हें कि अंगे एक हेनों देश रहलें छै, जेकरों नीव रामायणो युग से पहिले वेदकालीने समाजे में पड़ी चुकलें छेलै आरो जे आपनों ब्रात्य धर्म संस्कृति के कारण उत्तर से लैके दक्षिण तक कें प्रभावित करी रहलें छेलै।

बेशक, प्रकारान्तर से हरेन्द्र के काव्य ‘शंबूक’ यहू इतिहास कें प्रस्तुत करै छै कि आर्य कालीन समाज में अंग प्रदेश के ब्रात्य—समाज पर, पश्चिम प्रान्त के प्रभाव के कारण, की रं जातीय व्यवस्था के प्रभाव बढ़लै, जेकरों कारण नैं खाली अंग के शासके प्रभावित हुए लागलै, बलुक एकरों सबसे ज्यादा दुष्परिणाम समाज के सरल जीवन जीयै वाला प्रजाहै के भुगतै लें लागी रहलें छै।

हीर प्रसाद ‘हरेन्द्र’ के ई प्रबंध काव्य खाली काव्य नैं, आधुनिक भारत के समाज के चित्रे नैं, अंग प्रदेश के एकटा इतिहासो छेकै। जखनी ई शंबूक काव्य पर विचारलें जाय, तें एकराहौ पर ध्यान केन्द्रित करवों जरूरी होतै।

डॉ० अमरेन्द्र

विजया दशमी (28 सितम्बर 2009)

(IV)

—: सर्ग के बात :-

पहिलों सर्ग (09-15) प्रभु श्री राम के मर्यादित काम आरू विषय प्रवेश।

दोसरोँ सर्ग (16-22) राम के दरवार, धोबी के आरोप, सीता वनवास।

तेसरोँ सर्ग (23-30) ब्राह्मण के बेटा के अकाल मृत्यु, राम किंकर्तव्य विमूढ़, शूद्र द्वारा विधाभ्यास।

चौथों सर्ग (31-37) शूद्र के खोज, शंबूक के आश्रम, शंबूक के परिचय।

पाँचवों सर्ग (38-47) राम शंबूक संवाद, शंबूक बध।

॥ शंबूक ॥

सर्ग- ①

रवि-शशि पोषित ई धरा,
युग-युग करों भार।
ढोनें आवै सर्वदा,
कर सब के उपकार ॥ 1 ॥

युग-युग में होलै यहाँ,
ईश्वर के अवतार।
व्यापित भी अद्भुत रहै,
ज्ञानों के संचार ॥ 2 ॥

सत्यासक्त, दयालद्विज,
हरिश्चन्द्र के नाम।
कोन चूक मरघट फिरै,
रोजे सुवहो-शाम ॥ 3 ॥

त्रेता में श्री राम के,
गाबै सब्भैं गीत ।
पढ़लौं-लिखलौं कार्य सब,
छेलै परम पुनीत ॥4 ॥

पुरुषोत्तम श्री राम के,
मर्यादित सब काम ।
मर्यादा निर्वाह में,
जकरोँ पूरा नाम ॥5 ॥

पिता वचन पालन करै,
सहै कष्ट दिन-रात ।
सीता, लक्ष्मण साथ में,
मर्यादा के बात ॥6 ॥

पर परिभाषा काल क्रम,
उल्टी-पुल्टी जाय ।
मर्यादा के बात भी,
समुचित कहाँ लखाय ॥7 ॥

कृष्ण-कंस के युद्ध में,
कृष्ण कहाबै आर्य ।
कंस दुराचारी सदा,
रहै असभ्य, अनार्य ॥8 ॥

कृष्णों के सम्मान में,
शब्द ढूँढ़लौं जाय ।
कंसों केरों आचरण,
लोगों केँ भड़काय ॥9 ॥

पर जब लड़लै इन्द्र सेँ,
वहें कृष्ण भगवान ।
परिभाषा बदलै वहाँ,
जानै सकल जहान ॥10 ॥

देवराज देवेन्द्र केँ,
समझै सब सिरमौर ।
कृष्ण चराबै गाय केँ,
घूमै चौरे-चौर ॥11 ॥

टकराबै देवेन्द्र सेँ,
होलै कृष्ण अनार्य ।
सब देवों के देवता,
वहाँ कहाबै आर्य ॥12 ॥

घातक लागै छै सदा,
जब करना विष पान ।
दवा रूप में होय छै,
विष के भी गुणगान ॥13 ॥

जे हमरा लें तुच्छ छै,
जे बिल्कुल नाकाम ।
वोहीं कहियो गैर लें,
खूब चुवाबै घाम ॥ 4 ॥

रामचन्द्र भगवान के,
काम बड़ा अनमोल ।
टपकै मुँह सें मधुरता,
ज्यों मिश्री के घोल ॥ 5 ॥

पर सीता के सामनें,
रहै परीक्षा भाय ।
जकरा सें सीता सही,
गेलै तब घबड़ाय ॥ 6 ॥

धरती मैया कें कहै,
अब नैं सहलौं जाय ।
लें चल अपनों धाम तौं,
जल्दी धरती माय ॥ 7 ॥

ऐलौं गोदी छोड़ जब,
तब सें छी बेचैन ।
आँसू सें भरलौं रहै,
तभियो दोनों नैन ॥ 8 ॥

अर्ज सुनै मैया जहाँ,
धड़फड़ करनें आय ।
देखी अहिनों दृश्य कें,
सब के सिर चकराय ॥ 9 ॥

धरती मैया गोद में,
सभा बीच बैठाय ।
दुनिया के दुख-दर्द सें,
मुक्त करै समझाय ॥ 20 ॥

की भोगलकै राज सुख,
वें नहिरा-ससुराल ।
कहिया बनलै राम जी,
सीता लेली ढाल ॥ 21 ॥

चौदह वर्षो बाद जब,
आबै घर श्री राम ।
बारी-बारी सें करै,
सब कें राम-सलाम ॥ 22 ॥

गुरुजन, परिजन बात पर,
गद्दी पर आसीन ।
चौदह वर्षो सें रहै,
गद्दी राजा हीन ॥ 23 ॥

राजा बिन गद्दी कहाँ,
 शोभै छेलै भाय ।
 परजा सोच-बिचार में,
 रहै सदा लपटाय ॥24 ॥

अब रामों के राज में,
 सम्मानित व्यवहार ।
 खुशहाली सौंसे नगर,
 सब के नेक बिचार ॥25 ॥

रहै कोय धनवान की,
 रहै कोय बलवान ।
 राजों में सब के सजा,
 मिलतै एक समान ॥26 ॥

कपड़ा-लत्ता, अन्न-जल,
 लेली नैं मुँहताज ।
 रोग-शोक कुच्छू कहाँ,
 रामचन्द्र के राज ॥27 ॥

रामचन्द्र के राज में,
 गलत जरा नैं काज ।
 सच्चा के साम्राज्य में,
 झूठा के नैं राज ॥28 ॥

पर चक्कर में झूठ के,
 फसलै कृपा निधान ।
 आगू छै शंबूक के,
 कैसें गेलै प्राण ॥29 ॥

होनी-अनहोनी सब होतै,
 कौनें पैतै पार ।
 ईश्वर खुद्दे बनवैनें छै,
 माया के बाजार ॥30 ॥

पहुँचते बस बतलाना छै,
 वन में करै निवास ।
 छोड़ी देतै लोगे तभिये,
 करना सब उपहास ॥ 1 0 ॥
 ब्रह्म वाक्य रामों के सुनथैं,
 लक्ष्मण मारै हाय ।
 आज्ञा पालन करना छोड़ी,
 बचलै कोन उपाय ॥ 1 1 ॥
 जौने जेना बात सुनलकै,
 सब गेलै घबड़ाय ।
 रामों-सीता के भाग्यों में,
 सब कें खोट लखाय ॥ 1 2 ॥
 चललै सीता लक्ष्मण साथें,
 जंगल करों ओर ।
 आँखी सें तें झरतें रहलै,
 वैदेही कें लोर ॥ 1 3 ॥
 सोचै विधना की लिखनें छै,
 हमरा सब लीलार ॥
 एकधै पल में बदली दै छै,
 जीयै के संसार ॥ 1 4 ॥

घना, मध्य जंगल में पहुँची,
 लक्ष्मण रथ कें रोक ।
 सीता माता के आगू में,
 प्रकट करलकै शोक ॥ 1 5 ॥
 सीता छोड़ी जंगल बीचें,
 लौटें लगलै घोर ।
 बादल गरजै, बिजली चमकै,
 बून्दा-बून्दी झोर ॥ 1 6 ॥
 पवन बहै पुरवैया तखनी,
 लक्ष्मण छूवै पाँव ।
 सीता जे-से सोचै छेली,
 बैठी गाछी छाँव ॥ 1 7 ॥
 लक्ष्मण जैन्हें रथ कें हाँकै,
 सीता आगू आय ।
 गुप्त बात कुछ बोलै तखनी,
 लक्ष्मण कें समझाय ॥ 1 8 ॥
 गूढ़ रहस्य बताबै सीता,
 लक्ष्मण सें दिल खोल ।
 गरभों में छै बच्चा जानों,
 रहै बात नैं गोल ॥ 1 9 ॥

शंका सें भरलौं छौं भैया,
तोहीं दिहो बताय ।
अहिनों नैं शंका के आगें,
फेनूँ दिहो जराय ॥20॥

वैदेही के बात सुनी कें,
लखन लाल निस्तेज ।
के पतिथैतै जंगल छेकें,
फूलों करों सेज ॥21॥

लक्ष्मण घूमी आबी गेलै,
सीता करै बिचार ।
शरण गहाँ मैया वनदेवी,
जे करतै उपकार ॥22॥

ऐलै एगो संत वहाँ पर,
बाल्मीकि रहै नाम ।
दिव्य भाल पर शोभै चन्दन,
रहै दया के धाम ॥23॥

महामुनि नजदीक आबी कें,
बोलै मधुरे बोल ।
जंगल में आबै के पुत्री,
भेद जरा सा खोल ॥24॥

पहिनै कुच्छू सहमै सीता,
आँखी भरलौं लोर ।
सम्हरी फेनूँ आगू आबी,
बोलै छै कर जोर ॥25॥

राजा जनकों करों बेटी,
राम प्रिया जग जान ।
जंगल आबै के कारण सें,
हम्मैं छी अनजान ॥26॥

देवर लक्ष्मण पहुँचैनैं छै,
प्रभु के आज्ञा मान ।
हमरा तकदीरों में लिखलौं,
छै जंगल सुनसान ॥27॥

कहै बाल्मीकि नैं कर बेटी,
आगू पश्चात्ताप ।
हमरों परम शिष्य वैदेही,
छेकै तोरों बाप ॥28॥

बापे, दादा, गुरुजन समझौं,
ई कहै छिहों स्पष्ट ।
हमरा आश्रम में नैं होतै,
तोरा कोनों कष्ट ॥29॥

मुनि सीता कें आश्रम लानी,
आदर से बैठाय ।
आश्रमवासी कें सीता के,
लाचारी समझाय ॥30 ॥
रघुकुल तिलक रामचन्द्रों के,
नारी सबै जान ।
आश्रमवासी करे लागलै,
जे समुचित सम्मान ॥31 ॥
रामों के राजों में ई सब,
की कहभो अन्याय ।
मर्यादित सब काम राम के,
मन देथौ चकराय ॥32 ॥
मन के राजा रामचन्द्र छै,
सत्य धर्म अपनाबै छै ।
राजा के आगू तें अहिनों,
ढेर समस्या आबै छै ॥33 ॥

सर्ग-३

परजा के लाखों माथा में,
बात कहाँ की-की अटतै ।
खूब बिचारै करों छेकै,
ग्रह-गोचर केना कटतै ॥1 ॥
एकाएकी ऐथै आगू,
सबै कें फड़ियाना छै ।
जनता के आगू में अपनों,
उज्ज्वल कृति दिखलाना छै ॥2 ॥
यहें सोच रामों के रहलै,
धर्म ध्वजा फहराबै छै ।
एक समस्या बढ़लौ-चढ़लौ,
फेनू आगू आबै छै ॥3 ॥
एगो बाबा जी के बेटा,
कालों गाल समाबै छै ।
बाबा जी तें गिरलौ-पड़लौ,
आबी धूम मचाबै छै ॥4 ॥

युगों करों प्रभाव तखनको,
कुच्छू तें अहिनों छेलै ।
बापों के आगू में बेटा,
मुसीबतों तक नैं झेलै ॥5 ॥

मरना नैं मुमकिन बेटा के,
बापों के जीतों रहतें ।
त्रेता के कुछ बाते अहिनों,
सुनै छिये सब कें कहतें ॥6 ॥

लाश रखलकै दरवाजा पर,
ललकारै छै रामों कें ।
अन्यायी छै रामचन्द्र ई,
बतलाबै छै गामों कें ॥7 ॥

रघु, दिलीप, शिवि, सगर प्रतापी,
राजा राज चलैनें छै ।
अपना नामों करों झंडा,
युग-युग में फहरैनें छै ॥8 ॥

सब के कथा -कहानी जानौं,
धर्म ग्रंथ उलटैनें छी ।
कृति गाबै छै तीनों लोकें,
खोट जरा नैं पैनें छी ॥9 ॥

ऊ सब कें गद्दी पर रहतें,
बात कभी नैं ऐलों छै ।
बापों आगू मरन पुत्र के,
कहीं जरा नैं गैलों छै ॥10 ॥

अनहोनी घटना ई घटलै,
रामचन्द्र के राजों में ।
देखै छी साफे झलकै छै,
कोढ़ समैलै खाजों में ॥11 ॥

रामों कें गद्दी बैठै सें,
पाप राज में बदलों छै ।
रामों के पापों सें अखनी,
हमरों बेटा मरलों छै ॥12 ॥

कहाँ गेलहें वशिष्ठ महामुनि,
हमरा आगू आबों तें ।
कैसें हमरों बेटा मरलै,
हमरा तों समझाबों तें ॥13 ॥

कोन पाप सें जंगल गेलै,
पंचवटी अपनाबै लें ।
सूर्पनखा तभिये तें ऐलै,
नाक-कान कटबाबै लें ॥14 ॥

जकरा देहें खून जरा नै,
 उनको अलग कहानी छै।
 बाहुबली के आगू ककरो,
 चललो कब मनमानी छै ॥ 5 ॥

मान-प्रतिष्ठा जोगै लेली,
 रावण मारै वाणों सें।
 करी ब्रह्म हत्या सीता कें,
 लानै शान-गुमानों सें ॥ 6 ॥

पाप ब्रह्म हत्या सें बदलो,
 धरती पर नै जानै छै।
 रावण बड़का पंडित ज्ञानी,
 तीनों लोकें मानै छै ॥ 7 ॥

हमरो बेटा के हत्यारा,
 अत्याचारी रामे छै।
 झलकै छै अन्याय पूर्ण सब,
 आय राम के कामे छै ॥ 8 ॥

करो बिचार अयोध्यावासी,
 मुँह हमरो की ताकै छौं।
 सही बात आगू में बोलो,
 बगलो सें की झाँकै छौं ॥ 9 ॥

शुरूआत अभी छौं हमरा सें,
 ऐथौं सब के पारी तें।
 एक आदमी के पापों सें,
 बदलै दुनियादारी तें ॥ 20 ॥

हल्ला-गुल्ला खूब करलकै,
 रामचन्द्र दरवारों में।
 रामचन्द्र के नैया फसलै,
 तब बीचे मझधारों में ॥ 21 ॥

निकली गेलै कथा-कहानी,
 रामचन्द्र के माथों सें।
 श्रवण पिता सें पहिनें मरलै,
 राजा दशरथ हाथों सें ॥ 22 ॥

मेघनाद रावण के आगू,
 अपनों प्राण गमैनें छै।
 तइयो बाबा जी के बातें,
 रामों कें भरमैनें छै ॥ 23 ॥

कोन मुसीबत केना कटतै,
 रामचन्द्र पछताबै छै।
 सीता कें जंगल भेजाना,
 याद वहाँ पर आबै छै ॥ 24 ॥

किंकर्तव्यविमूढ़ राम छै,
 कठिन समस्या जानी कॅ।
 दूतों कॅ भेजी बोलाबै,
 बढ़िया पंडित-ज्ञानी कॅ ॥25॥

आबी गेलै वही समय में,
 पंडित हाथें लें पतरा।
 बतलाबै छै राम राज पर,
 आबी गेलों छै खतरा ॥26॥

रामचन्द्र घबडाबै, बोलै,
 पंडित जी बात बताबों।
 मन बेकाबू होलै हमरों,
 आबें नैं ढेर सताबों ॥27॥

पंडित नारी खूब टटोलै,
 रामचन्द्र भगवानों के।
 पंडित जी कॅ पोथी-पतरा,
 कमी जरा नैं ज्ञानों के ॥28॥

बोलै राजों में शूद्र कहीं,
 विद्या के अभ्यास करै।
 ओकरे कृति पताका फहरै,
 वें कर्तें कॅ नाश करै ॥29॥

पूजा, जप, तप, योग शूद्र के,
 सब अनुचित कहलाबै छै।
 पोथी-पतरा, धर्म ग्रंथ सब,
 अहिनें बात बताबै छै ॥30॥

ब्राह्मण करों बेटा मरलै,
 वोही शूद्रों के चलतें।
 पंडित जी कुछ व्याकुल झलकै,
 बात यहें कहतें-कहतें ॥31॥

दरवारों में मातम छैलै,
 घटना ई अनहोनी छै।
 पता लगाबें ऊ शूद्रों के,
 फानै कोना-कोनी छै ॥32॥

राम उठाबै धनुष बाण खुद,
 खोजें में घूमै सगरे।
 खोज करलकै दिशा-दिशा में,
 खोज करै नगरे-नगरे ॥33॥

गाँव-मुहल्ला पागल नाँकी,
 धनुष-वाण लें हाथों में।
 कुच्छू पंडित पतरा लें कॅ,
 पीछू-पीछू साथों में ॥34॥

मन भरमाबै रामों करों,
 पंडित के चाल अनूठा।
 सब दिन सदा पढ़ैनें ऐलै,
 सबभै कें सच्चा-झूठा ॥3 5 ॥

एगो भूल छिपाना गर छौं,
 झूठ अनेकों बोलै छौं।
 जानी-बूझी सब बातों के,
 भेद जरा नै खोलै छौं ॥3 6 ॥

बड़का-बड़का के मंसूबा,
 पोथी में भुतलाबै छै।
 तखनी अपनों सोच-समझ तें,
 जरा काम नै आबै छै ॥3 7 ॥



जे परमेश्वर अन्तर्यामी,
 तीन लोक के स्वामी।
 उनका दर-दर भटकाबै छै,
 ठौर-ठौर खल-कामी ॥3 8 ॥



सर्ग- 4

चाँद-चाँदनी, बादल-पानी,
 जुड़लौं एक्के बंधन।
 विषधर साथें जीना-मरना,
 सोची लै छै चन्दन ॥1 ॥

माली के जीवन जेना कें,
 बीतै फूलों साथें।
 रंग मेहदी के लागै छै,
 उपकारी के हाथें ॥2 ॥

राजा-परजा वोही रङ् छै,
 भेद-भाव नै मन में।
 राज पाट छोड़ी रामो तें,
 खोजै छै वन-वन में ॥3 ॥

परजा पालक राजा जे छै,
 परजा हित के लेली।
 जगदम्बा सीता माता कें,
 जंगल दै छै ठेली ॥4 ॥

राजा परजा के चक्कर में,
घूमै जंगल-जंगल ।
भूखों प्यासों से छै व्याकुल,
की जंगल में मंगल ॥5 ॥

हर परजा के सुखी बनाना,
फर्ज हमेशा मानै ।
सब के खुश राखै के लेली,
जंगल-जंगल छानै ॥6 ॥

पर कोनों भी न्याय हमेशा,
एक्के पक्षे होतै ।
सदा दोसरो पक्ष वही पर,
गिरतै-पड़तै, रोतै ॥7 ॥

पोथी-पतरा के चक्कर में,
नाटक करतै राजा ।
ऊ राजा के भरले रहतै,
जनता से दरवाजा ॥8 ॥

एक समस्या मिटतै जेन्हें,
आगू के तैयारी ।
रात-दिन ते ऐथे रहतै,
हरदम पारा-पारी ॥9 ॥

मर्यादा सब भूली गेलै,
ब्राह्मण केरो आगू ।
ब्राह्मण के रक्षा क्षत्री के,
धर्म वहाँ छै लागू ॥10 ॥

सगरे घूमै पर नै पाबै,
थक्की डालै डेरा ।
सावित होलै सचमुच वैठाँ,
दीपक तले अंधेरा ॥11 ॥

एगो आश्रम पाँव रखलकै,
स्वर्ग जेना लागै ।
निरखी शोभा बाग-बगीचा,
थकावटे सब भागै ॥12 ॥

दुभड़ी वाला घास पसरलो,
लागै बिछलो चादर ।
ऊ आश्रम में सम्भव छेलै,
सबै केरो आदर ॥13 ॥

चिड़ियाँ चुनमुन-चुनमुन करनें,
मचलै डाली-डाली ।
आमी गाछी कखनूँ कुहुँकै,
कोयल काली-काली ॥14 ॥

भौंरा भनभन करने आबै,
 होलों जे मतवाला ।
 जकरो मन छै देहो नाँकी,
 मानो सचमुच काला ॥ 5 ॥
 तोता के बोली में मिश्री,
 ऋषिवर साथें गाबै ।
 आगन्तुक से बात करै लें,
 तोते आगू आबै ॥ 6 ॥
 रंग-बिरंगा फूल खिललका,
 क्यारी-क्यारी सोहै ।
 इन्द्रधनुष रंग तितली केरो,
 पंख हमेशा मोहै ॥ 7 ॥
 आश्रम में बैठै के जग्घो,
 गाछी केरो नीचें ।
 ऋषिवर ठीक जमैनें छेलै,
 आसन वोही बीचें ॥ 8 ॥
 कूशों के आसन पर बैठी,
 वेद-शास्त्र उल्टाबै ।
 ब्रह्म-जीव संबंध अनोखा,
 सब्भै कें बतलाबै ॥ 9 ॥

सेवक सब सत्कार करै में,
 लगलों छेलै पूरा ।
 सब्भै के माथा पर झलकै,
 छै चोटी गोखुरा ॥ 20 ॥
 सादा जीवन उच्च विचारों,
 के सब्भे अनुयायी ।
 सब कामों में गुरुदेवों कें,
 देतें रहै दुहाई ॥ 21 ॥
 स्वर्ग धरा पर उतरी ऐलों,
 वैठों सब्भै मानै ।
 कोन साधु-संतों के डेरा,
 पर नैं तनियों जानै ॥ 22 ॥
 राम पहुँचलै आश्रम जखनी,
 तन-मन गदगद होलै ।
 आश्रम में आगत के स्वागत,
 ऋषिवर धीरे बोलै ॥ 23 ॥
 चेला-चटिया देखी सब कें,
 स्वागत के तैयारी ।
 छेकै मंत्र 'अतिथि देवो भव',
 सब्भै लें सुखकारी ॥ 24 ॥

स्वागत सैं संतुष्ट राम नैं,
 ध्यान काम पर ज्यादा ।
 ज्ञानवान शंबूक कहाबै,
 आश्रम में मर्यादा ॥25॥

परिचय-पाती महा जरूरी,
 रामों लेली छेलै ।
 उनका आँखी बाबा जी के,
 शव हरदममें हेलै ॥26॥

रामचन्द्र जब परिचय पूछै,
 शंबूक बताबै छै ।
 दलदल में फसलों छी हम्मों,
 ई गीत सुनाबै छै ॥27॥

जन्म-जात शंबूक शूद्र छी,
 महर्षि आय कहाबौं ।
 आश्रम में बैठी ईश्वर के,
 महिमा हर पल गाबौं ॥28॥

लोभ-मोह-मद काम भगाबौं,
 धर्म-कर्म सैं नाता ।
 समदर्शी परमेश्वर हमरों,
 हरदम गुरु-पितु-माता ॥29॥

शांति बसै हमरा आश्रम में,
 शांति दूत कहलाबौं ।
 ईश्वर दया दृष्टि हमरा पर,
 रूखा-सूखा पाबौं ॥30॥

भक्ति भाव में लीन हमेशा,
 मोह पाश नैं धेरे ।
 हर संकट के क्षण में प्रभुवर,
 आँख हमेशा हेरै ॥31॥

●

जाति-पाति के नामें ऐठाँ,
 नैं उच्चों नैं नीच ।
 सब जन एक समान यहाँ पर,
 प्रेम सदा सब बीच ॥32॥



सर्ग- 5

सुनथैं पिलही चमकी गेलै,
 सोचै तखनी राम ।
 आबैं ऐलों छै आगू में,
 जे छेलै गुमनाम ॥1॥ ॥

शंबूक देखाबै नम्रता,
 आग बबूला राम ।
 रामें चाहै करना जल्दी,
 सब्भे काम तमाम ॥2॥ ॥

शंबूक कहै बढिया नाँकी,
 धन्य-धन्य छौं भाग ।
 देह जरै बढिया बातों सैं,
 रामें उगलै आग ॥3॥ ॥

शूद्र होय तों पाप कमाबैं,
 कर विद्या अभ्यास ।
 तोरों पाप निवारण लेली,
 ऐलौं तोरों पास ॥4॥ ॥

ब्राह्मण होय के धृष्टताई,
 अगर करै छै शूद्र ।
 धर्म ग्रंथ अनुसार बताबौं,
 बिचार छेकै क्षूद्र ॥5॥ ॥

ई अपराध अक्षम्य कहाबै,
 तों वध केरों योग ।
 धरती पर पूरा होलै सब,
 आजे तोरों भोग ॥6॥ ॥

तोरा पापों सैं मरलों छै,
 ब्राह्मण केरों लाल ।
 आबी गेलै सचमुच तोरों,
 यही समय में काल ॥7॥ ॥

शंबूक सुनाबै रामचन्द्र,
 क्षत्री कुल अवतार ।
 बालि बधै में देह छिपाबै,
 जानै छै संसार ॥8॥ ॥

निर्दोष बालि के आगू में,
 ऐतें लागै लाज ।
 जकरा चलतें सुग्रीवों पर,
 गिरलै पूरा गाज ॥9॥ ॥

ऊ तें पर्वत छेलै अहिनों,
जहाँ बचाबै प्राण ।
तोरा बल पर गेले छेलै,
सब्भे शान-गुमान ॥ 1 0 ॥

क्षत्री केरों धर्म कहै छै,
मरला कें नैं मार ।
शरण पड़ै जे आबी केन्हों,
तकरा शीघ्र उबार ॥ 1 1 ॥

लघुशंका खातिर जे बैठै,
तकरा लाठी मार ।
क्षत्री कुल के मर्यादा नैं,
पग-पग पर धिक्कार ॥ 1 2 ॥

बालि समर में शोर मचाबै,
बैठै राम नुकाय ।
ई कामों के राज जरा सा,
हमरा दें समझाय ॥ 1 3 ॥

तोरा सें नैं झगड़ा-झंझट,
नैं तोरा सें रार ।
बालि मरै तोरा हाथों सें,
की छेलै दरकार ॥ 1 4 ॥

मुनि वशिष्ठ वैज्ञें बैठी कें,
सूनै छेलै बात ।
बोलै रे शंबूक यहाँ छैं,
धर्म ग्रंथ के साथ ॥ 1 5 ॥

'छोटका भाय केरों पत्नी,
लागै बेटी मान ।
बुरा नजर जकरोँ बेटी पर,
उ तें पापी महान ॥ 1 6 ॥

ओकरोँ वध जरूरी समझें,
राम करलकै ठीक ।
सब लोगों कें ई बातों सें,
लेना चाही सीख' ॥ 1 7 ॥

शंबूक कहै 'सचमुच महर्षि,
तों तें बाजा डोल ।
राजा जहिनों राग अलापै,
तहिनें तोरोँ बोल ॥ 1 8 ॥

छोटका भाय केरों पत्नी,
सही बेटी समान ।
बड़का भैया केरों पत्नी,
बोल जरा नादान ॥ 1 9 ॥

‘बड़का भैया करों पत्नी,
जेना अपनों माय ।’

मुनि वशिष्ठ बोलै सनकी कें,
धीरज जरा गमाय ॥20 ॥

शंबूक बताबै जोरों सें,
‘बालि बसै सुरधाम ।

रावण करों रामें जखनी,
करलक काम तमाम ॥21 ॥

तारा कें सुग्रीव रखे छै,
हरदम अपनों पास ।

मन्दोदरी-विभीषण बनलै,
अपनों दोनों खास ॥22 ॥

धनुष-वाण हेराबै तखनी,
राम वहाँ चुपचाप ।

बैठी खाली करतें रहलै,
माला करों जाप ॥23 ॥

बलात्कार सें कोनों नारी,
दूषित जब नै होय ।

सही अहिल्या करों गाथा,
जानै छै सब कोय ॥24 ॥

अग्नि परीक्षा सीता करों,
जानै छै संसार ।
सीता खातिर होलों छेलै,
रावण सें तकरार ॥25 ॥

फेनू कारण कोन निकललै,
सीता के वनवास ।
लव-कुश दोनों भटकै अखनी,
सीता केरो पास ॥26 ॥

की खैतै, की पीतै दोन्हूँ,
ककरा छै दरकार ।
झलकै छै रामों कें अखनी,
झूठ-मूठ तकरार ॥27 ॥

सही तथ्य पर परदा डाली,
इधर-उधर के बात ।
भला आदमी करों साथें,
छेकै ई आघात ॥28 ॥

गुरु वशिष्ठ के एक बात पर,
सब खोलै शंबूक ।
हमरा बातों सें देहों में,
तोरा उठथौं हूक ॥29 ॥

राम कहै 'बकवास बन्द कर
 गुरु वशिष्ठ के ज्ञान ।
 जन साधारण लेली मुश्किल,
 करना छै पहचान ॥30 ॥
 बस में जकरा इष्ट सदा सें,
 छेकै वहें वशिष्ठ ।
 इनका आगू बोली भाषा,
 होना चाही शिष्ट' ॥31 ॥
 'भाषा-बोली शिष्ट कहाँ सें,
 ऐतै जे छै नीच ।
 ऋषिवर बोलै ऊ सब सीखों,
 गुरु वशिष्ठ के बीच ॥32 ॥
 आपनों पाप महर्षि माथें,
 मढ़ना तोरों नीति ।
 मर्यादा पुरुषोत्तम लेगाँ,
 बचलै कहाँ अनीति ॥33 ॥
 राजा कें के कहें पारतै,
 देखी कुच्छू दोष ।
 सब गलती झाँपै के लेली,
 खुल्ले पूरा कोष ॥34 ॥

सही पिता के नातें तोरों,
 लव-कुश सें व्यवहार ।
 जौनें समुचित आज बतावै,
 तकरे छै दरकार ॥35 ॥
 पत्नी करों लालन-पालन,
 पति के पावन धर्म ।
 जंगल भेजी राज चलाना,
 छेकै ई दुष्कर्म ॥36 ॥
 सीता पर जे बीती रहलै,
 ककरा छै आभास ।
 लव-कुश केना जीबी रहलै,
 सीता करों पास ॥37 ॥
 ऊ पापों सें ब्राह्मण करों,
 बेटा कें नै कष्ट ।
 राजा के संरक्षण पाबी,
 ब्राह्मण होलै भ्रष्ट ॥38 ॥
 जे मन आबै बात बनावै,
 छेकै ई सत्कर्म ।
 राजा कें कुमार्ग बताना,
 समझै अपनों धर्म ॥39 ॥

हम्में दलदल में छी फसलों,
सम्हरी लौं जों सांस ।
कैसें होलै हमरा चलतें,
ब्राह्मण करों नाश' ॥40 ॥

'अपनों बचाव लेली बढिया,
तोरों छै ई तर्क ।
पर हमरा क्रोधों पर ऐतै,
तनियो टा नैं फर्क ॥41 ॥

जे अपराध अक्षम्य कहाबै,
समुचित देना दण्ड ।
नैं तें करतै देखा-देखी,
होतै लोग उदण्ड ॥42 ॥

खींची लेलक झट तरकश सें,
रामें एगो वाण ।
शंबूकों के ऊपर करलक,
वाणों के संधान ॥43 ॥

शंबूक गिरै भू पर तखनी,
भुतलाबै छै ज्ञान ।
छिपलै देखी बादल नीचें,
दिन रहतें दिनमान ॥44 ॥

शोभाहीन लगै फुलवारी,
मातम चारो ओर ।
तोता चुप्पी साधी बैटै,
लोर बहाबै मोर ॥45 ॥

कन्ना रोहट साथें मचलै,
आश्रम में कुहराम ।
ब्राह्मण साथें सिधियाबै छै,
पुरुषोत्तम श्री राम ॥46 ॥

जकरो शासन शूद्र नैं,
करतै विद्याभ्यास ।
बाघ-छाग संगें फिरै,
कैसें ई विश्वास ॥47 ॥



हीरा प्रसाद 'हरेन्द्र' : एक परिचय

जन्म : 06/09/1950, कटहरा, सुलतानगंज, (भागलपुर)

सम्मान/पुरस्कार/उपाधि:

1. डॉ० अम्बेदकर फेलोशिप, राष्ट्रीय सम्मान (05/12/2001)
(दलित साहित्य अकादमी, दिल्ली)
2. खूब लाल महतो स्मृति पुरस्कार (उत्तंग हमरों अंग लेली)
(अ० भा० अंगिका साहित्य कला मंच) (09/06/2001)
3. जगदीश पाठक मधुकर- कुल विभाकर (05/05/2002)
(समय साहित्य सम्मेलन, पुनसिया, बाँका)
4. इन्दिरा देवी स्मृति सम्मान (12/08/2003) (बरियारपुर, मुंगेर)
5. जनार्दन बाबू रजत स्मृति सम्मान (08-09/11/2003)
(अ० भा० अंगिका साहित्य कला मंच, खगड़िया)
6. पंडित गोपी नाथ तिवारी पुरस्कार (25/12/2005)
जाहनवी अंगिका संस्कृति संस्थान, पटना
7. सरला स्मृति साहित्यकार सम्मान (अंगप्रिया के सफल सम्पादन लेली)
जानकीपुर पबई (बाँका) (09/12/2007)
8. भारतेन्दु हरिश्चन्द्र रजत स्मृति सम्मान ('ठकहरा' लेली) (15/06/2008)
(हिन्दी भाषा साहित्य परिषद्, खगड़िया)
9. पंडित जगदीश पाठक मधुकर, काव्य साहित्य साधना स्मृति सम्मान
(भागलपुर प्रमण्डलीय अ० भारतीय भाषा साहित्य सम्मेलन)
10. स्व० वैकुण्ठ विहारी स्मृति सम्मान (तारापुर, मुंगेर)
1. कवि रत्न (विक्रमशिला हिन्दी विद्यापीठ)
2. अंग श्री (अ० भा० भाषा साहित्य सम्मेलन प्रमंडलीय शाखा, भागलपुर)
3. अंग श्री (क्षेत्रीय सर्वभाषा कवि सम्मेलन, खड़िया, मुंगेर)
4. साहित्य श्री (अ० भा० भाषा साहित्य सम्मेलन, भोपाल)
5. साहित्य रत्न (मंगनी लाल स्मृति ट्रस्ट, बाँसी, बाँका)
6. अंग शिरोमणि (राज्य स्तरीय सर्व भाषा सद्भावना काव्योत्सव, उघाडीह, भागलपुर)
7. कवि शिरोमणि (विक्रमशिला हिन्दी विद्यापीठ, गाँधीनगर, ईशीपुर, भागलपुर)
8. पंचशील शिरोमणि (पंचशील चैरिटेबुल सोसायटी, 25/4 कड़कड दुम्म एरिया,
सेंट्रल बैंक के ऊपर, नई दिल्ली 110092-भारत)
9. अंग-पतंग (अ० भा० अंगिका साहित्य सम्मेलन, जिला शाखा-भागलपुर)
10. अंगिका सपूत (अ० भा० अंगिका साहित्य कला मंच प्रखण्ड शाखा-शंभुगंज)

प्रशस्ति पत्र (देर साहित्यिक संस्थाओं द्वारा)

देश के स्तरीय पत्रिकाओं में रचना प्रकाशित और आकाशवाणी

भागलपुर से अंगिका कहानी- कविता सम्प्रसारित

सम्प्रति - सम्पादक - मंजिल / अंगप्रिया

महामंत्री- अखिल भारतीय अंगिका साहित्य कला मंच

शिक्षक - रा० मध्य विद्यालय, कुमारपुर, कटहरा, सुलतानगंज, भागलपुर

सम्पर्क- ग्राम+पो०-कटहरा, सुलतानगंज (भागलपुर)-813213

मो०-9931854246/9334753128

शंबूक/हरेन्द्र